

漢南遊草

漢南遊草序

古人遊必有作非爲遊也閱其山川名蹟風景人物
與平時讀書考古所懷想者若相發焉因動於中而
不能已成爲紀載著爲詩歌亦足見舉步不忘學舉
念不忘世之意矣吾讀漢南遊草竊嘆魯泉子真天
下有心人哉魯泉子遊漢南豈有心乎遊卽爲是編
豈有心乎作迺自魯泉子有作吾不遊漢南吾不宦
遊漢南也漢南有魯泉之紀有魯泉之詩漢南之遊
爲不虛漢南之地亦可以益著也其遊也往反凡月
餘自西安而梁洋數十日之內如歷漢南於千秋數

十紙之中如對漢南於千里境之奇險逶迤回伏變幻出尋常意想之外文如之詩亦如之以文言一武侯之冢舉定軍一山歸之言真言僞者皆不容置喙矣以詩言一大真之墓以死難忠臣弔之或惜或恨者皆可以平情矣其他山川名蹟風景人物隨其感觸情自切意自遠言自獨至固由平時讀書考古所懷想者不同有心人當前之見抑亦自殊也吾交魯泉子久今乃愈得其深矣是編也似倣漁洋秦蜀驛程記雍益集諸作然實非倣也魯泉之視漁洋如漁洋之視放翁地近而遊各異文與詩自各得有漁洋

正不可無魯泉也魯泉著作已成十餘種他日與此
彙而梓之當有信予非阿私所好者桐閣弟李元春

漢南遊草題詞

少華鍾奇秀偉人生華胄家學溯巾箱經綸彌世宙
綺歲佐清時文光絢列宿性耽山水游名園赴幽構
騷壇牛耳持關西獲領袖著書迺等身千言援筆就
金石攷輿圖經世世爲壽中丞偕漢南故實咨親
舊終南萬象羅雲山爭輻輳一一筆之書靈奇頓然
售紫栢定軍山千秋憑左右商於采三芝南里尋難
究秦篆兼漢碑搜剔無挂漏地志註山經化工腕奔
湊繼之以詩訶解明奧而透大哉筆如椽巖壑恒在
宥顏謝才非奇李杜今迺又焚香讀萬回斯文堪俎

豆仙掌雨初晴大河波激溜渾灝恣雄奇

先生筆

爲收孰纂三輔圖受之等心授晴濤趙浣瀛

漢南紀游

少華王志沂魯泉著

道光癸未盧厚山中丞赴漢南一帶閱兵偕余往九月十九日自省發五十里咸陽縣宿縣東南五里過灃橋按灃水自終南山流出西行經鄠縣界東折三十里入咸陽境又五十里入渭渭水在城南唐時有西渭橋今久圯咸陽古渡爲關中八景之一水面甚濶北望城垣頗雄壯城北卽畢原孟子所謂畢郢也考史記畢公高與周同姓武王封之於畢卽此東西長數百里文武成康周公太公及秦漢君臣陵墓多在焉城周八里九分九門縣志云城跨渭岸屈曲不

方以象斗杓城內街市繁盛亦右輔劇邑也縣北五里有唐涼國公契苾明碑殷元祚正書又有內侍李輔光墓誌明萬歷中涇岸崩陷壅水不流三日乃得此石銘云水竭源遷斯文乃傳可謂奇矣

二十日五十里興平縣尖按縣秦曰廢邱漢曰槐里武帝葬此置茂陵宣帝又改平陵唐時始改興平城周七里四門倚黃麓山一名黃山卽始平原長五十里漢書云茂陵富人袁廣漢於此築園東西四里南北三里水木亭臺擬於上苑王摩詰詩黃山舊繞漢宮斜卽此城北十七里卽武帝茂陵衛青霍去病金

日碑霍光墓俱在陵旁蓋當時陪塋者城西三十里
馬嵬有楊貴妃墓題詠甚多墓出白土如粉曰貴妃
粉婦女面有黑痣者擦之卽除縣學中有隋賀若誼
碑正書方整精健惜下半磨泐又有隋常醜奴墓志
石已不存唐千福寺在縣境顏魯公所書多寶塔及
楚金禪氏碑已移入西安府學碑林漢丞相平當平
晏韋賢韋元成王嘉皆縣人

九十里武功縣宿城周三里二百步五門縣東二里
下尙家坡過武水橋武水卽水經注之杜水源出麟
遊縣南流入渭縣東西皆有原東曰東原西曰西原

城在釜底街市亦寬廠南門外有橫渠祠姜嫄墓縣
西南十五里有唐蘇相國瓌蘇許公廼墓墓有碑隸
書廬藏用撰序張說撰銘惜剝蝕過半按蘇氏爲縣
巨族自漢蘇武至宋蘇昞官至卿相者幾三十人明
康殿撰海亦縣人

二十一日扶風縣尖縣城亦在坡底依岡而建東南
皆面水西北曰館原東南曰三峙原東北曰周原西
南曰漳水西北曰漆水城周四里七門街市皆隨坡
勢高下與邊省山城無異縣東二十里有漢班固墓
路旁短碑僅尺許半沒草土中西南七里有漢馬援

墓考漢書援卒有諡之者不敢以喪還藁塋長安城西後上書訴寃然後得塋於此漢之待功臣可謂薄矣固援皆縣人城東南一里飛鳳山有三班祠祀彪固超後又增曹大家爲四班祀又有三馬祠祀援融超又有伏波祠在東關坡上專祀援城北二十里有法門寺卽唐迎佛骨處也又名無憂王寺有無憂王寺真身寶塔碑千佛碑陀羅尼經幢皆唐碑之著名者

六十里岐山縣宿縣名始於隋開皇古爲岐下自太王遷此國號周岐周之名始著城在平原周五里三

門無北門岐山在城北五十里一名高柱山其峰高峻迥出諸山上五丈原在城南五十里斜谷口諸葛武侯駐軍地太王陵在城北李淳風墓在城東北五里考河南府志淳風墓在新安縣畿輔志在涿州皆無所徵信淳風岐山人似應以此爲是西北十五里有周公廟山勢廻合古木蒼翠爲岐邑勝景廟內有唐靈泉碑書法工整尙未剥落

二十二日五十里鳳翔府宿城周十二里六門東關街市長五六里極繁盛館舍在舊鳳邠道署亦宏敞城內東南隅有秦穆公冢東門外有東湖宋蘇文忠

公爲僉判時引鳳凰泉水瀦爲池有宛在亭臨水三楹四面皆窓岸北建蘇公祠屋宇四重壁間題詠甚多湖有蓮二三畝岸旁垂柳數百株大皆合抱有數百年者間以修竹翠蓋紅芳插金戛玉亦游觀勝地也凌虛臺喜雨亭皆圯廢惟存東坡凌虛臺記在府治後堂壁間城南半里有三良冢考左傳文公六年秦伯任好卒以子車氏三子爲殉皆秦之良也又十五里有鳳臺乃秦弄玉吹簫引鳳之所又二十里名石鼓原卽得石鼓之所

二十三日六十里底店尖去鳳翔三十里下一大坡

過汧水考汧水源出汧陽縣南流入渭王漁洋詩斜
日一川汧水北秋山萬點益門西卽指此三十里寶
鷄宿城周三里七分三門無北門館舍在東門外後
臨渭水一望空濶南岸諸峯皆入窓內夕陽在山紅
紫萬狀儼然一幅溪山暮靄圖也至夜船頭漁火明
昧林外尤爲可觀縣東南五十里礪溪河卽太公垂
釣處其投竿跼餌兩膝遺跡猶存

二十四日城南過河十五里益門鎮從此入棧有坊
題曰益門雄鎮二十五里二里關據高嶺上長亘二
里因名乃棧道必由之路卽古大散關路頗險峻十

里觀音堂尖十五里煎茶坪卽大散嶺高二十里上
至峯巔俗傳漢高祖引兵由故道出駐馬煎茶於此
因名五里東河橋地勢稍寬二十里黃牛堡宿屬寶
雞此地西北通甘肅東接太白當四路總匯宋將樊
玠築堡拒金於此自入益門峰巒奇峭紅葉滿巖路
轉峯迴別有天地令人應接不暇過此皆爲川楚客民
開墾種地焚燒林木一望了無可觀

二十五日入鳳縣界一路傍山臨澗穴巖架木修棧
道數十段其下爲故道水一名大散河源出太白山
入縣境繞鳳縣城西入兩當界四十里草涼驛尖七

十里鳳縣宿城周四里三門無南門自草涼驛至此路甚平坦

二十六日出縣西門卽上坡迤邐而上二十里至鳳嶺連峰排列如鳳舒翼爲棧道第一高峻之處躋其巔雖盛夏亦涼冬春常積冰雪有關門額曰去天尺五下坡十五里心紅舖兩峰挿天中通一棧澗水潺湲竹木幽秀爲棧中佳處十五里三岔驛尖屬鳳縣此路東接廢邱地稍平夷有古柳數株青條垂地爲鳳縣一絕王漁洋蜀道驛程云鳳縣卽古鳳州有手柳酒三絕今則手無可取酒味甚薄惟柳尙存蓋自

昔已然矣四十里南星宿屬畱壩廳

二十七日出南星卽陳倉道口西通黑河乃韓信暗度之地四十里高橋對橋卽紫柏山高峰挿天巉巖奇峭四圍青林紅樹爲棧道第一奇景相傳乃子房辟穀處中有七十二洞峻險人不能到滿山皆紫柏故名又七里柴關嶺不甚陡峻接連紫柏兩面高崗林木陰翳下有連理亭後有連理樹乃栗樹二株比連而生兩樹相合長尺許又復枝幹各分又八里廟臺子尖屬畱壩有畱侯祠甚壯麗嘉慶二十一年新修祠旁有亭有池有花木頗可玩賞惜道士甚俗不